

Polasaí Iontrála Scoil Iognáid

**Seoladh na Scoile:
Bóithrín na Sliogán, Gaillimh
Uimhir Rolla: 19371Q**

Pátrúin na Scoile: An tAthair Leonard Moloney SJ, Cúigíoch, Ord na nÍosánach agus an tEaspag Breandán Ó Ceallaigh, Easpag na Gaillimhe, Chill Mhic Dhuach agus Chill Fhionnúrach

1. Réamhtra

Comhlíonann an Polasaí Iontrála seo ceanglais an Achta Oideachais 1998, an Achta Oideachais (Iontráil i Scoileanna) 2018 agus an Achta um Stádas Comhionann 2000. Agus an polasaí seo á dhréachtú, chuaigh Bord Bainistíochta na scoile i gcomhairle le foireann na scoile, le pátrún na scoile agus le tuismitheoirí leanaí atá ag freastal ar an scoil.

D'fhaomh an pátrún scoile an polasaí ar an **[dáta]**. Tá sé foilsithe ar shuíomh gréasáin na scoile agus cuirfear ar fáil i gcóip chrua é ar iarratas d'aon duine a iarrann é.

Tá na dátaí agus na hamlínte ábhartha do pholasaí iontrála Scoil Iognáid leagtha amach san fhógra maidir le hiontráil bhliantúil na scoile a fhoilsítear go bliantúil ar shuíomh gréasáin na scoile seachtain amháin ar a laghad roimh thús an phróisis iontrála don scoilbhliain lena mbaineann.

Ní mór an polasaí seo a léamh i gcomhar leis an bhfógra maidir le hiontráil Bhliantúil na scoile don scoilbhliain lena mbaineann.

Foilsítear an fhoirm iarratais i gcomhair iontrála ar shuíomh gréasáin na scoile agus cuirfear cóip chrua di ar fáil d'aon duine a iarrann sin.

Sa chás nach bhfuil an leagan Gaeilge agus an leagan Béarla ag teacht le chéile is ag an leagan Gaeilge a bheidh forlámhas.

2. Spiorad sainiúil agus cuspóirí ginearálta na scoile

Is scoil náisiúnta lán-Ghaelach chomhoideachais í Scoil Iognáid le héiteas Caitliceach faoi phátrúnacht Chúigíoch Ord na nÍosánach agus faoi phátrúnacht Easpag na Gaillimhe. Ciallaíonn 'éiteas Caitliceach' éiteas agus spiorad sainiúil an Eaglais Chaitlicigh Rómhánaigh, a chuireann chun cinn

- (a) Forbairt iomlán na ndaltaí – idir intleachtúil, mhothálach, fhisiciúil, spioradálta, aeistéitiúil agus shóisialta agus
- (b) Gaol beo le Dia agus le daoine eile; agus
- (c) Fealsúnacht saoil bunaithe ar chreideamh i nDia agus saol, bás agus aiséirí Íosa; agus
- (d) Oiliúint na ndaltaí sa chreideamh Caitliceach.

Cuirimid oideachas reiligiúnda ar fáil do na daltaí de réir dhúnghaoisí , chleachtais agus thraidisiúin na hEaglaise Caitlicí Rómhánaí agus/ nó de réir mar a leagann Comhdháil Easpag na hÉireann amach.

De réir S.15 (2) (b) den Acht Oideachais 1998, seasfaidh Bord Bainistíochta Scoil Iognáid le, agus beidh sé freagrach don phátrún as, spiorad sainiúil na scoile de réir na luachanna cultúrtha, oideachasúla, mórálta, reiligiúnda , sóisialta, teangúla agus spioradálta a threoraíonn chuspóirí agus reachtáil na scoile.

Ráiteas Misin agus Cuspóirí Ginearálta Scoil Iognáid

Is scoil lán-ghaelach, Caitliceach í Scoil Iognáid a bunaíodh i 1971, a fheidhmíonn faoi phátrúnacht na nÍosánach. Ba scoil phríobháideach í faoi phátrúnacht na nÍosánach roimh 1971 agus tradisiún ársa oideachais aici ach cinneadh dul isteach sa gcóras poiblí an bhliain sin.

Déanann Scoil Iognáid oideachas a sholáthar trí mheán na Gaeilge. Is í an Ghaeilge teanga cumarsáide na scoile i measc na múinteoirí agus na daltaí.

Déanann muid timpeallacht shuaimneach, chomhbhách a chur ar fáil chun gach gné den pháiste - intleachtúil, spioradálta, fisiciúil, cultúrtha, morálta, fobairt shóisialta agus mhothúchánach a chothú.

Tá an comhoibriú, an chúirtéis agus an dea-iompar riachtanach d'éifeachtacht na scoile agus do fhorbairt agus dul chun cinn ár ndaltaí.

Spreagann misean oideachais agus cruinneshamhail na nÍosánach misean oideachais Scoil Iognáid agus tá muid tiomanta dó.

Is cuid de mhisean na nEaglaise leis an domhan a dhaonnú, freastal a dhéanamh air agus glóir a thabhairt do Dhia an tOideachas Íosánach.

Tógann an cur chuige Íosánach, mar gheall ar a mhisean, inspioráid ó chruinneshamhail ina chastar le Dia i ngach uile rud, a fheiceann fíoraí don bheatha dhaonna i bpearsa Íosa agus a chruthaíonn creideamh a dhéanann an chóir. Fásann na daltaí i dtreo na saoirse agus na freagrachta taobh istigh de phobal atá dírithe ar fhoghlaim, ina dtugann siad faoi deara an tacaíocht phearsanta (cura personalis) agus ina ndéanann siad a ndícheall le barr feabhais (magis) a bhaint amach i ngach uile ní.

Téann an cur chuige mar gheall ar mhúineadh agus foghlaim go smior sa Pharaidím Oideolaíochta Iognáidach, gur timthriall dinimiciúil taitní, machnaimh agus gníomhaíochta a chuireann comhthéacs an fhoghlaiméora san áireamh chomh maith le measúnú leanúnach le planáil don todhcháí é.

Is cuspóir é don Oideachas Íosánach céimithe a chruthú gur “fir agus mná ar son agus lena chéile, a bhéarfaidh a mbeo, ní ar mhaithe leo féin ach ar mhaithe le Dia agus a Chríost” agus “fir agus mná inniúla le coinsiasa agus díongbháilteacht thrócaireach” iad.

Is riachtanach oiliúint an *choinsiasa* do shláinte an tsochaí agus an duine aonair le gurbh fhéidir an mhaith agus an t-olc, an ceart agus an chearr a aithint agus idirdhealú a dhéanamh eatarthu. Is mian leis an Oideachais Íosánach daoine saora a mhúnlú, a bhfuil

coinsias iontu, sa dóigh is go mbainfear feidhm as a gcoinsias pearsanta le tionchar a imirt ar an saol.

Is féidir leis an duine *inniúil* eolas a chruthú, a thuiscint agus a chur i bhfeidhm. Cuidíonn an tOideachas Íosánach leis na daltaí aithne a chur ar na tallanna agus na scileanna a thug Dia dóibh. Threoraíonn sé iad ar bhealach ina dtig leo iad a chur ar obair i dtimpeallachta éagsúla. Bíonn an tOideachas Íosánach ag iarraidh ar dhaltaí an réimse inniúlachta a bhíonn faoi fhionnachtain acu a leathnú leis na scileanna go léir, intleachta, mothúchánacha, aeistéitiúla, sóisialta agus creideamh-bunaithe a chuimsiú.

Ní hionann an *trócaire* agus trua a mhothú ar son duine nó ghrúpa áirithe. Is beag an bháilacht gan beart. Caithfidh gníomh deimhneach a theacht mar thoradh ar an trócaire. Aithníonn an trócaireach céimíocht agus fiúntas an duine daonna, a eascraíonn go simplí as doimhneacht ghrá Dé. Ba chóir go dtugadh an trócaire orainn go léir ár ndlúthpháirtíocht leis an duine eile a mhothú agus aghaidh a thabhairt ar leagan amach na struchtúr i bhforas daonna ar bith le go dtig linn agus ár ndaltaí athruithe chun feabhais a chur i bhfeidhm agus aisling Dé a chur i gcrích.

Is duine a bhfuil misneach ina ghníomhartha an duine a bhfuil *tiomantas* ann. Déanann an duine a bhfuil tiomantas ann iarracht a bheith údarach. Bíonn sé nó sí ag iarraidh a bheith beo de réir luachanna seanbhunaithe a bhfuil tacaíocht chaoi dóibh agus gurbh fhéidir leo brúnna ón taobh amuigh a dhiúltú. Sa scoil Íosánach, bíonn na daltaí ag cur luachanna áirithe faoi léirmheas go córasach agus go criticiúil agus cuireann siad tús lena rogha ar a mbealach féin chun tosaigh dá réir. Bíonn siad ag machnamh ar an tionchar a bheadh ag na luachanna seo ar a gcaidreamh le daoine eile, ar a bhfeidhm ar a dtallanna agus ar an tslí bheatha atá le roghnú acu.

Is féidir tuilleadh eolais ar shaintréithe an Oideachais Íosánaigh a fháil ar www.scoilognaid.ie

3. Ráiteas maidir le hlontráil

Ní dhéanfaidh **Scoil Iognáid** idirdhealú maidir le dalta a ligean isteach i scoil ar bhonn aon cheann díobh seo a leanas:

- a) inscne an dalta nó an iarratasóra i leith an dalta lena mbaineann,
- b) stádas sibhialta an dalta nó an iarratasóra i leith an dalta lena mbaineann,
- c) stádas teaghlaigh an dalta nó an iarratasóra i leith an dalta lena mbaineann,
- d) gnéaschlaonadh an dalta nó an iarratasóra i leith an dalta lena mbaineann,
- e) reiligiún an dalta nó an iarratasóra i leith an dalta lena mbaineann,
- f) bunús mhíchumas an dalta nó an iarratasóra i leith an dalta lena mbaineann,
- g) cine an dalta nó an iarratasóra i leith an dalta lena mbaineann,
- h) dalta nó iarratasóir ó phobal an lucht siúil i leith an dalta lena mbaineann, nó
- i) riachtanais speisialta oideachais a bheith ag an dalta nó ag an iarratasóir i leith an dalta lena mbaineann.

De réir Alt 61 (3) den Acht Oideachas 1998, forléireofar 'foras stádais shibhialta', 'foras míchumais', 'leithcheal', 'foras stádas teaghlaigh', 'foras inscne', 'foras cine', 'foras reiligiúin', 'foras gnéaschlaonta' agus 'foras pobail Taistil' de réir alt 3 den Acht um Stádas Comhionann 2000.

Comhoibreoidh Scoil Iognáid leis an gComhairle Náisiúnta um Oideachas Speisialta i gcomhlíonadh feidhmeanna na Comhairle faoin Acht um Oideachas do Dhaoine a bhfuil Riachtanais Speisialta Oideachais Acu 2004 maidir le soláthar oideachais do leanaí a bhfuil riachtanais speisialta oideachais acu, lena n-áirítear soláthar agus feidhmiú rang nó ranganna speisialta nuair a iarrann an Chomhairle a leithéid.

Comhlíonfaidh Scoil Iognáid le haon ordúchán a sheirbheálfar ar an bpátrún nó ar an mbord, de réir mar is ábhartha, faoi alt 37A agus le haon ordúchán a sheirbheálfar ar an mbord faoi alt 67(4) (b) den Acht Oideachais.

Is scoil Chaitliceach í Scoil Iognáid a bhfuil mar chuspóir aici oideachas a chur ar fáil i dtimpeallacht a chuireann luachanna an chreidimh Chaitlicigh chun cinn agus nach ndéantar idirdhealú nuair nach nglactar le hiarratasóir nach den chreideamh Caitliceach é/í nuair a chruthaítear an gá leis an diúltú sin chun éiteas na scoile a chaomhnú.

4. Na catagóirí de Riachtanais Speisialta Oideachais a ndéantar freastal orthu sa scoil/sa rang speisialta

Ní scoil speisialta í Scoil Iognáid agus níl rang nó aonad speisialta ag gabháil léi faoi láthair. Ach mar sin féin, tá Scoil Iognáid tiomanta do thimpeallacht fháiltiúil agus ionchuimsitheach a chothú do pháistí uile na scoile.

5. Daltaí a ligean isteach

Ligfidh **Scoil Iognáid** isteach gach dalta atá ag lorg iontrála ach amháin sna cásanna seo a leanas –

- a) i gcás ina bhfuil ró-éileamh ar an scoil (féach **alt 6** thíos le haghaidh tuilleadh sonraí)
- b) i gcás go dteipeann ar thuismitheoir dalta, nuair a éilíonn an príomhoide é de réir alt 23(4) den Acht Oideachais (Leas) 2000, a dhearbhu i scríbhinn go bhfuil cód iompair na scoile inghlactha dó nó di agus go ndéanfaidh sé nó sí gach iarracht réasúnach lena chinntiú go gcomhlíonfaidh an dalta an cód sin

Is scoil Chaitliceach í Scoil Iognáid a d'fhéadfadh gan glacadh le hiarratasóir nach den chreideamh Caitliceach é/í nuair a chruthaítear an gá leis an diúltú sin chun éiteas na scoile a chaomhnú.

6. Ró-iarratas

Sa chás go bhfuil ró-éileamh ar an scoil, déanfaidh an scoil na critéir roghnaithe a leanas a chur i bhfeidhm san ord ina bhfuil siad thíos maidir leis na hiarratais a fhaightear laistigh den amlíne chun iarratais a fháil mar atá leagtha amach i bhfógra iontrála na scoile agus na hiarratais ar chead isteach á gcinneadh aici.

Déilealfar leis na hiarratais a fuarthas do na blianta 2021, 2022, 2023, 2024, 2025 faoi fhorálacha an Pholasaí Iontrála a bhí i bhfeidhm ag an am sin.

1. Deartháireacha agus deirfiúracha na daltaí atá ag freastal ar Scoil Iognáid faoi láthair na huaire
2. Deartháireacha agus deirfiúracha na ndaltaí a d'fhreastail ar Scoil Iognáid.
3. Mic agus iníonacha foireann uile Scoil Iognáid a bhfuil conradh buan nó CID acu, nia nó neach, garnia nó garneach de chuid Íosánaigh na hÉireann nó Íosánaigh eile a cuireadh chuig Cúige na hÉireann nó Íosánaigh ó Chúigí eile atá ag obair in Éirinn.
4. Mic agus iníonacha iardhaltaí Scoil Iognáid, suas go dtí 25% d'uasmhéid líon na n-áiteanna atá ar fáil don scoilbhliain sin de réir an Fhógra Bhliantúil. Séard is iardhalta ann ná dalta a d'fhreastail ar Scoil Iognáid ar feadh trí bliana.
5. Daltaí go bhfuil leibhéal líofachta acu atá ar leibhéal a mbeifeá ag súil leis dá mbeadh an teanga á labhairt mar ghnáthmhodh cumarsáide i suíomh neamhoideachasúil, ag tógaint san áireamh aois agus aon riachtanais speisialta oideachais atá ag an bdalta agus go mbeadh an dóchúlacht go n-imeodh an líofacht luaite ar gcúl muna scaoilfí an dalta isteach i scoil Ghaeilge.
6. Iarrthóirí eile a fuairamar roimh an dáta deireannach d'iarratais de réir an Fhógra Bhliantúil
7. Iarrthóirí eile a fuairamar taobh amuigh den dáta deireannach d'iarratais de réir an Fhógra Bhliantúil.

Tabhair faoi deara: Sa chás gur mian le tuismitheoirí go n-áireofaí a bdalta mar pháiste a bhfuil leibhéal líofachta sroichte aige/ aici sa Ghaeilge tabharfar cuireadh don tuismitheoir fianaise a chur ar fáil chun an líofacht sin a léiriú do ionadaithe an Bhord Bainistíochta. Is gá an fhianaise sin a chur ar fáil leis an iarratas, ach amháin fianaise a chuirtear ar fáil trí freastal ar chruinniú ar láthair na scoile – má iarrann na tuismitheoirí/caomhnóirí a leithead sin de chruinniú. Déanfaidh Bord Bainistíochta na scoile an cruinniú sin a shocrú.

Muna nglactar leis an bhfianaise cuirfear an dalta i gcatagóir eile, de réir mar is cuí. Is féidir achomharc i scríbhinn/ríomhphost a dhéanamh chuig an mBord Bainistíochta laistigh de sheachtain amháin ón gcinneadh a fháil. Iarrfar ar bheirt ionadaí eile ón mBord an fhianaise a bhreithniú. Ní cheadófar fianaise nua. Is ag an mBord Bainistíochta a bheidh an cinneadh deireannach

Má ghlactar leis an bhfianaise, ach go mbeartaíonn an tuismitheoir an dalta a chur siar go dtí Liosta Iarrthóirí na bliana ina dhiaidh sin, ní bheidh gá fianaise a chur ar fáil arís don leibhéal líofachta sa Ghaeilge.

Más mó líon na n-iarratas in aon chatagóir ná líon na spásanna ar fáil don chatagóir sin, cuirfear na hiarrthóirí go léir sa chatagóir sin in ord ar crannchur. Is mar seo a leanas a dhéanfar an crannchur:

1. Déanfar ainmneacha a thógáil amach go randamach ó dhroma.
2. I gcás siblíní mar shampla cúpla nó tríriní – cuirfear a n-ainmneacha sa druma mar iarratas amháin
3. Déanfar liosta feithimh bunaithe ar ord na n-ainmneacha amach as an druma i. an chéad ainm amach an chéad duine ar an liosta feithimh srl.
4. Beidh finné neamhspleách i láthair ag féachaint ar an gcrannchur.

7. An méid nach mbreithneofar ná nach gcuirfear san áireamh

De réir alt 62(7)(e) den Acht Oideachais 1998, ní dhéanfaidh an scoil aon cheann díobh seo a leanas a bhreithniú ná a chur san áireamh agus iarratais ar chead isteach á gcinneadh nó nuair a bhíonn dalta á c(h)ur ar liosta feithimh le haghaidh iontrála sa scoil.

- a) Freastal roimh ré ag dalta ar réamhscoil nó ar sheirbhís réamhscoile, lena n-áirítear naíonraí
- b) Íocaíocht táillí nó ranniocaíochtaí (cibé slí a dtuairiscítear é) leis an scoil
- c) Cumas, scileanna nó inniúlacht acadúil an dalta seachas de réir fhorálacha alt 62(9) den Acht;
- d) Gairm, stádas airgeadais, cumas acadúil, scileanna nó inniúlacht tuismitheoirí dalta;
- e) Ceanglas go bhfreastalóidh dalta, nó a t(h)uismitheoirí ar agallamh, lá oscailte nó cruinniú eile mar choinníoll iontrála;
- f) Ceangal dalta leis an scoil de bhua duine dá t(h)eaghlach ag freastal ar an scoil nó a bhí ag freastal ar an scoil roimhe sin; seachas i gcás (1) siblíní a fhreastalaíonn ar an scoil nó a d'fhreastail ar an scoil agus (2) tuistí an dalta a d'fhreastail ar an scoil. Maidir le (2) tuistí an dalta a d'fhreastail ar an scoil is suas go dtí 25% d'uasmhéid líon na n-áiteanna atá ar fáil don scoilbhliain sin de réir an Fhógra Bhliantúil.
- g) An dáta agus an t-am ar ghlac an scoil le hiarratas iontrála.

Tá sé sin faoi réir an iarratais a bheith faighte ag am ar bith le linn tréimshe a shonraítear chun iarratais a fháil mar atá leagtha amach i bhFógra Iontrála Bliantúil na scoile don scoilbhliain lena mbaineann.

Tá sé sin faoi réir freisin ag an scoil tairiscintí a dhéanamh bunaithe ar liostaí feithimh reatha (suas go dtí an 31 Eanáir 2025 amháin).

8. Cinntí ar iarratais

Béidh na cinntí go léir maidir le hiarratais ar iontráil chuig **Scoil Iognáid** bunaithe ar na nithe a leanas:

- Polasaí iontrála na scoile
- Fógra iontrála bliantúil na scoile (nuair is cuí);
- An fhaisnéis a chuir an t-iarratasóir ar fáil le agus i bhfoirm iarratais oifigiúil na scoile a fuarthas le linn na tréimhse atá sonraithe inár bhfógra iontrála bliantúil chun iarratais a fháil;

(Féach thíos **alt 14** maidir le hiarratais dhéanacha agus **alt 15** maidir le nósanna imeachta maidir le daltaí a lígean isteach i mblianta eile seachas naíonáin bheaga)

Ní úsáidfeadh critéir roghnúcháin nach n-áirítear inár bpolasaí iontrála scoile chun cinneadh a dhéanamh maidir le hiarratas ar áit inár scoil.

9. Cinntí a chur in iúl d'iarratasóirí

Cuirfeadh iarratasóirí ar an eolas i ríomhphost/ scríbhinn maidir le cinneadh na scoile, laistigh den amlíne atá leagtha amach san fhógra bliantúil iontrála.

Mura dtairgtear áit do dhalta inár scoil, cuirfeadh na cúiseanna nár tairgeadh áit dó nó di ar fáil i scríbhinn don iarratasóir, lena n-áirítear, nuair is infheidhme, sonraí maidir le rangú an dalta i gcoinne na gcritéir roghnúcháin agus na sonraí faoi áit an dalta ar an liosta feithimh don scoilbhliain lena mbaineann.

Cuirfeadh iarratasóirí ar an eolas faoin gceart chun athbhreithniú/ceart achomhairc a lorg maidir le cinneadh na scoile (féach **alt 18** thíos le haghaidh tuilleadh sonraí).

10. Glacadh le tairiscint áite ag iarratasóir

Agus tairiscint iontrála á glacadh agat ó **Scoil Iognáid**, ní mór duit an méid a leanas a léiriú:

- (i) cé acu an bhfuil nó nach bhfuil glactha agat le tairiscint iontrála ar scoil nó ar scoileanna eile. Má ghlac tú le tairiscint den sórt sin, ní mór duit sonraí na tairisceana nó na dtairiscintí lena mbaineann a chur ar fáil freisin.
- (ii) cé acu an bhfuil iarratas déanta agat ar thairiscint iontrála ó scoil nó ó scoileanna eile nó cé acu an bhfuil tú ag feitheamh lena dheimhniú, agus má tá, ní mór duit sonraí na scoile nó na scoileanna eile lena mbaineann a sholáthar.

11. Cuinsí nach féidir tairiscintí a dhéanamh nó ar féidir tairiscint a tharraingt siar dá mbarr

Ní féidir le **Scoil Iognáid** tairiscint iontrála a dhéanamh, nó is féidir tairiscint a tharraingt siar, sna cásanna a leanas:

- a) déantar amach go bhfuil an fhaisnéis atá san iarratas bréagach nó míthreorach.
- b) teipeann ar iarratasóir glacadh le tairiscint iontrála ar nó roimh an dáta atá leagtha amach i bhfógra iontrála bliantúil na scoile.
- c) má theipeann ar thuismitheoir dalta, nuair a éilíonn an príomhoide é de réir alt 23(4) den Acht Oideachais (Leas) 2000, a dhearbhu i scríbhinn go bhfuil cód iompair na scoile inghlactha dó nó di agus go ndéanfaidh sé nó sí gach iarracht réasúnach lena chinntiú go gcomhlíonfaidh an dalta an cód sin; nó
- d) teipeann ar iarratasóir riachtanais a chomhlíonadh chun 'glacadh le tairiscint' mar atá leagtha amach in **alt 10** thuas.

12. Sonraí a roinnt le scoileanna eile

Ba chóir d'iarratasóirí a bheith feasach go gceadaítear le hAlt 66(6) den Acht Oideachais (Iontráil Scoileanna), 2018 comhroinnt sonraí idir scoileanna d'fhonn iontráil éifeachtach daltaí a éascú.

13. Liosta feithimh i gcás ró-iarratais

I gcás go mbeidh níos mó iarratas ar an scoilbhliain lena mbaineann ná na háiteanna atá ar fáil, tiomsófar liosta feithimh de dhaltaí nár éirigh lena n-iarratas ar iontráil chuig **Scoil Iognáid** mar gheall ar ró-éileamh ar an scoil agus beidh siad bailí don scoilbhliain ina bhfuil cead isteach á lorg.

Tá socrúchán ar liosta feithimh **Scoil Iognáid** san ord tosaíochta a shanntar d'iarratais na ndaltaí tar éis don scoil na critéir roghnúcháin a chur i bhfeidhm de réir an pholasaí iontrála seo. Cuirfear na hiarratais dhéanacha ag deireadh an liosta feithimh, de réir an dáta a fuarthas na hiarratais.

Déanfar tairiscintí maidir le haon áiteanna ina dhiaidh sin a bheidh ar fáil don scoilbhliain agus lena linn a bhfuil cead isteach á lorg ina leith maidir leis na daltaí sin ar an liosta feithimh, de réir an oird tosaíochta ar cuireadh na daltaí ar an liosta.

14. Iarratais dhéanacha

Breithneofar agus déanfar cinneadh ar gach iarratas ar chead isteach a fhaightear tar éis an dáta deiridh mar atá leagtha amach san fhógra iontrála bliantúil de réir pholasaí iontrála ár scoile, de réir an Achta um Iontrálacha Scoile 2018 agus de réir aon rialacháin a rinneadh faoin Acht sin.

Cuirfear cinneadh na scoile in iúl do na hiarratasóirí seo laistigh de thrí seachtaine ón iarratas a fháil. Déanfar áit a thairiscint don iarratasóir déanach – má tá áit ar fáil. Muna mbeidh áit ar fáil – cuirfear ainm an iarratasóra ar an liosta feithimh faoi mar atá leagtha amach in **alt 13**.

15. Nósanna imeachta maidir le daltaí a ligean isteach i mblianta eile agus le linn na scoilbhliana

Seo a leanas nósanna imeachta na scoile maidir le daltaí a ligean isteach nach bhfuil glactha isteach sa scoil cheana féin chuig ranganna nó blianta seachas grúpa iontrála na scoile:

- (a) Glacfar le daltaí i ranganna Naíonáin Mhóra – Rang 6 ar na coinníollacha seo a leanas:
 - (i) Má tá spás sa rang
 - (ii) Agus má shíleann an Príomhoide/ Bord Bainistíochta cumas Gaeilge an dalta a bheith ar leibhéal a ligfeadh don dalta feidhmiú agus foghlaim sa rang agus nach mbeadh aar dhaltaí eile iompú ar theanga eile chun cumarsáid a dhéanamh. **Is faoin tuismitheoir a bheidh sé fianaise chuige seo a chur os comhair an Bhoird Bhainistíochta leis an iarratas.**

- (b) Is gá do thuismitheoirí/caomhnóirí ar mian leo iarratas a dhéanamh ar áit in aon rang seachas Naíonáin Bheaga litir iarratais a scríobh chuig an Cathaoirleach. Is é an Bord Bainistíochta a dhéanfaidh an cinneadh faoi dhaltaí a ghlacadh in aon rang eile.

Tá na nósanna imeachta maidir le daltaí a ligean isteach le linn na scoilbhliana díreach mar atá thuasluaite.

16. Dearbhú maidir le gan táillí a ghearradh

Ní ghearrfaidh bord **Scoil Iognáid** ná aon duine a ghníomhaíonn thar a ceann táillí ar íocaíocht nó ní lorgeoidh sé nó sí íocaíocht ná ranníocaíocht (cibé slí a dtuairiscítear) mar choinníoll de -

- (a) iarratas ar dhalta a ligean isteach sa scoil, nó
- (b) iontráil nó clárú leanúnach dalta sa scoil.

17. Socruithe maidir le daltaí nach bhfreastalaíonn ar theagasc reiligiúnach

Seo a leanas socruithe na scoile do dhaltaí, sa chás gur iarr na tuismitheoirí, a d'iarr go bhfreastalódh an dalta ar an scoil gan freastal ar theagasc reiligiúnach sa scoil. Ní bheidh laghdú ar lá scoile na ndaltaí sin mar thoradh ar na socruithe seo.

Ba cheart iarratas scríofa a dhéanamh chuig Príomhoide na scoile. Eagrófar cruinniú leis na tuismitheoirí chun plé a dhéanamh ar conas is féidir déileáil leis an iarratas sa scoil.

18. An ceart chun athbhreithnithe/achomhairc

Athbhreithniú ar chinntí an Bhoird Bhainistíochta

Féadfaidh tuismitheoir mac léinn iarraidh ar an mbord athbhreithniú a dhéanamh ar an gcinneadh áit sa scoil a dhiúltú. Ní mór iarratais den gcineál sin a dhéanamh de réir Alt 29C den Acht Oideachais 1998.

Tá an t-amlíne ina gcaithfear athbhreithniú den gcineál sin a iarraidh agus na ceanglais eile a bhaineann maidir le hathbhreithnithe den gcineál sin leagtha amach sna nósanna imeachta arna gcinneadh ag an Aire faoi alt 29B den Acht Oideachais 1998 atá foilsithe ar shuíomh gréasáin na Roinne Oideachais agus Scileanna.

Déanfaidh an Bord athbhreithnithe den gcineál sin de réir na nósanna imeachta a rialaítear faoi Alt 29B i gcomhair le Alt 29C den Acht Oideachais 1998.

Tabhair faoi deara: Sa chás gur diúltaíodh áit d'iarratasóir mar gheall ar ró-éileamh ar áiteanna sa scoil, ní mór don iarratasóir iarraidh ar an mbord bainistíochta **athbhreithniú ar an gcinneadh** sin a dhéanamh roimh achomharc a dhéanamh faoi alt 29 den Acht Oideachais 1998.

Sa chás gur diúltaíodh áit d'iarratasóir mar gheall ar chúis seachas ró-éileamh ar áiteanna sa scoil, féadfaidh an t-iarratasóir iarraidh ar an mbord bainistíochta **athbhreithniú ar an gcinneadh** sin a dhéanamh roimh achomharc a dhéanamh faoi alt 29 den Acht Oideachais 1998.

Ceart achomhairc

Faoi Alt 29 den Acht Oideachais 1998, féadfaidh tuismitheoir mac léinn achomharc a dhéanamh ar chinneadh na scoile seo áit sa scoil a dhiúltú.

Is féidir achomharc a dhéanamh faoi Alt 29 (1)(c)(i) den Acht Oideachais 1998 sa chás gur diúltaíodh áit d'iarratasóir mar gheall ar ró-éileamh ar áiteanna sa scoil.

Is féidir achomharc a dhéanamh faoi Alt 29 (1)(c)(i) den Acht Oideachais 1998 sa chás gur diúltaíodh áit d'iarratasóir mar gheall ar chúis seachas ró-éileamh ar áiteanna sa scoil.

Sa chás gur diúltaíodh áit d'iarratasóir mar gheall ar ró-éileamh ar áiteanna sa scoil, **ní mór** don iarratasóir iarraidh ar an mbord bainistíochta **athbhreithniú ar an gcinneadh** sin a dhéanamh **roimh achomharc a dhéanamh** faoi alt 29 den Acht Oideachais 1998. (féach Athbhreithniú ar chinntí an Bhord Bainistíochta)

Sa chás gur diúltaíodh áit d'iarratasóir mar gheall ar chás seachas ró-éileamh ar áiteanna sa scoil, féadfaidh an t-iarratasóir iarraidh ar an mbord bainistíochta **athbhreithniú ar an gcinneadh** sin a dhéanamh roimh achomharc a dhéanamh faoi alt 29 den Acht Oideachais 1998. (féach Athbhreithniú ar chinntí an Bhord Bainistíochta)

Déanfar achomhairc faoi Alt 29 den Acht Oideachais 1998 a mheas agus a chinneadh ag coiste neamhspleách achomhairc arna cheapadh ag an Aire Oideachais agus Scileanna.

Tá an t-amlíne ina gcaithfear achomharc den gcineál sin a iarraidh agus na ceanglais eile a bhaineann maidir le hachomhairc den gcineál sin leagtha amach sna nósanna imeachta arna gcinneadh ag an Aire faoi alt 29B den Acht Oideachais 1998 atá foilsithe ar shuíomh gréasáin na Roinne Oideachais agus Scileanna.

Faofa ag Bord Bainistíochta Scoil Iognáid ar an 30 Aibreán chun cur faoi bhráid an Phatrúin.

